

SAN PABLO KARTA EFXESO ÇXHABTEWE'SX JÏI

Efxeso çxhabtewe'sxtxi fxi'jni

¹ Adxa' Jesukristo jxkaahnisa Pablo yaaseth, txã'wête selpiwa'jsa Dxus nvxiitnisa. Txãa pa'ga Dxus luuçx Efxeso çxhabtewe'sx jïi naa karta's fxi'jçxa kajaçthu, Kristo Jesusa's nwêese'jna fxi'zesawe'sxtxi weçxana.

² I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa, txãa pa'ga Dxus yakhçxáa mfxi'zewe.

Kristo jïi yuupa'ga Dxus iiméh wala pu'çxni

³ Kwe'sxtxi jxpe'jsa Jesukristo Tata's wala yuh weçxawa'j ji'ptha'w. Kwe'sxa' Kristo yakh utx-aapa'ga kîh yuhwa peejxmée jxukak txajx dxi'pte jxpubamée fxi'zewa'ja's nvxiht cielutewe'sx yu-
uwa'ja's.

⁴ Txãasa íik naa kiwe meetey Dxusa' kwe'sxtxi' txhitxh, kîh pkal yuhwa ji'phmée Kristo na'wêysa yuukahn.

⁵ Kwe'sxa' kîhte yuhwa seelpimeesatewa Dxusa' naasáa peeygãhçxa yuuçxáak Jesukristo nwe'wete', kwe'sx txajx luuçx yuuwa'ja's dxiikhëy vxitçxa nvxiht.

⁶ Txã'wê peeygãapa'ga Dxusa's bagaçxtewa weçxana yuuçxáa tuuthe'jwa'j ji'ptha'w, txajx Nçxi'k Jesukristo nwe'wepa'ga.

⁷ Txãa Jesukristok kwe'sxtxi' nwe'we txajx eeju kwe'sx pkaltxi jxuka peltunãyçxa. Nawa Dxusa' kwe'sxtxi wala peeygãhçxa yuuçxáak txã'wẽ yu-uwa'ja's vxit.

⁸ Txã'wẽy Dxusa' kwe'sxtxi' kĩhte yuhwa pee-jxmée jxuka ãate kaajiyu'kh.

⁹ Nyafxiitey kim yuhwa jiyunimeete ma'wẽ yuuwa'ja's ne' vxitçxa ji'phu' txã'snak kwe'sxtxi kaajiyu'j.

¹⁰ Txãa yu' na'wẽk yu': cielute ùssa vxite' naa kiwetewe'sx yã'jçxa jxuka Kristoçxaçxá's nwẽese'jwa'ja', aç'a' txã'wẽ yũuwa'j en ãhte', jxuka kxtey yuuna.

¹¹ Dxus jĩi yu'sa' jxuka jxpa'gawa'ja's Dxusa' nyafxiitey ne' pheu'jçxa nvxiht Kristo nwe'wenisawe'sx jĩi. Naa pa'ga Kristo nwe'wenisa' jxpa'gawa'jsatha'w Dxus pheu'jçxa nvxiitni yu' jxuka.

¹² Kwe'sx txã'wẽ yũuwa'ja'sku Dxusa' pheu'jçxa nvxiht, Kristo's nyafxte neewe'wesa kwe'sx txã'wẽ Dxus ew yũupa'ga weçxaakahn.

¹³ Aç'a' i'kwe'sxwa txã'wẽy Dxus yuwe ewte nvxiitwa'jsa's wẽse'jçxa Kristo yakh fxi'zeya' utx-aaçpkaçxha', Dxus ùsni txajx Espiritu' i'kwe'sx ùuste khëek, Dxus kuseju peena yu' txutekah-men.

¹⁴ Aç'a' Dxus Espiritu's ùuste ji'phsa' nmeh ente' txajx nasatx jxukate nwe'wena jxã'jniñũ' Dxus jĩi yu'sa' kĩhnawa jxuka jxpa'gawa'jsaçxa txã'wẽ txajx Espiritu's ji'phsa' ya'yuuna. Txãa pa'ga Dxus txakwe wala ew yũusa's weçxawa'ja'.

Dxus yakh jweeñiçxáa ew fxi'zewa'ja's kaajiyu'khan pēyni

¹⁵ Txãa pa'gath adxa' txã'wē i'kwe'sxa' Kristo Jesus yakh jxpubameetx fxi'ze', sa' Dxus luuçx jxukaysawe'sxtxi peeygãja'tx jñi's jiyuçxa',

¹⁶ bagaçxtewa Dxus yakh puutx we'wena weçxana nes yu'.

¹⁷ Sa' kwe'sxtxi nwe'wesa Jesukristo Tata cielutewe'sxa's pēyi'th, txãa yakh jweeñiçxáa ew fxi'zewa'ja's kaajiyu'khan,

¹⁸ kxah i'kwe'sxtxi kījxa' nwe'weçxawa ew kaajiyu'juna. Sa' cielute Dxus jī's kīhnawa jxuka jxpa'gawa'j ji'ptha'w txã' seena' yuh wala zhiçxkwesa' txã'snawa jiyune'kwe.

¹⁹ Sa' Dxus ãjanisa kwe'sx ũustxi yu'pthehsa' seena' yuh walasa' txã'snawa jiyune'kwe.

²⁰ Dxusa' txãa ãjanisa yakh ñiçxáak Kristo's uuniijūwa ki' itxi vxitçxa cielute txajx pukate kaykaçxi'j.

²¹ Sa' Kristo's cielute txajx pukate kaykaçxi'jçxak naa kiwete vxite' cielute maa maatewa jxthaakwe walasa vxitçxa jxkaahwa'ja's ũs, naa ente ma'k yuu meeçxa' vxite ente ma'k yuu nawa maatewa Kristoçxaçxáa jxthaakwe walasa yuukahn.

²² Dxusa' txã'wē yūuçxak kījkihwa Kristoçxaçxá's nwēese'jwa'ja's vxitçxa txajx luuçx yuutxi's Kristo yakh ih fxi'zewa'jsa vxit, txãawe'sx yuuçxáa maatewa puutejka wedxnisa txajx jxpe'jni yuukahn.

²³ Txãa pa'ga Kristo jxpe'jnisa' txãa yakh teeçxçxáa yuuna pa'jçxa, txãa na'wēysa

íiçxáata', kîh yuhwa jwee yu' peejmeesa.

2

Dxus peeygãapa'ga yuuçxáa nwe'wenisa

¹ Dxusa' Kristo'swa ma'wêga îtxi vxit, txã'wêyku i'kwe'sxtxiwa îtxi vxit. Txã'wême', nyafxiia' i'kwe'sxa' pkalpa'ga Dxus dxi'pte uuní na'wê yã'ji'kwe ũs yu'.

² Txãasai'kwe txagaçxtey yu' eçxthê'j naa kiwete jxkaahni yuuçxá's nwêese'jna ũsu'. Dxusa's nwêese'jya' wa'lsa yuutxi's eçxthê'ja' jweeíçxáak kwa'lu'ju', aça' txã'snai'kwe nwêese'jsa yu'.

³ I'kwe'sxçxáamée, kwe'sxwa nyafxiia' txã'wêçxaçxáatha'w fxi'zesa yu' jxukaysa, ewmée yaakxníçxá's jxuka kxtey yuuna. Txãa pa'ga Dxus kastigo seena'sa's jxpa'gawa'jsatha'w yu' maawa jxukaysa.

⁴ Nawa txã'wê pkalpa'ga Dxus dxi'pte uuní na'wê yã'j ũstewa, Dxusa' kwe'sxtxi iiméh wala ew yũuk peeygãhçxa.

⁵ Txãasak Kristo'swa ma'wêga uunijũwa îtxi vxit, txã'wêy kwe'sxtxiwa îtxi vxit. Kîhte yuhwa seelpimeesaçxawa, Dxus peeygãapa'ga yuuçxáai'kwe nwe'wenisa yuu.

⁶ Dxusa' Kristo'swa ma'wêga uunijũwa îtxi vxit, txã'wêy kwe'sxtxiwa îtxi vxitçxak cielute Kristo yakh kaykaçxi'j.

⁷ Nawa kwe'sxtxi txajx peeygãani txakwe seena' walasa's naa e'su' áate kaavxya'ja'jya'k txã'wê yũu kwe'sx txakwe wala áhmeekwetewa, naasáa Kristo pa'ga yuuçxáa.

8 Txãa pa'ga i'kwe'sxa' k̄hte yuhwa seelpimeesaçxawa, naasáa Dxus peeygãhçxa nwe'wenisaçxáa i'kwe, txã'wẽ Kristo's úusuh jxuka yaakxpa'ga. Dxus nwe'weni's i'kwe'sx kakweju ew yũuna fxi'zeçxa uymeei'kwe, txã'sa' Dxusku pees peeygãhçxa.

9 Dxus nwe'weni's kakweju ew yũuna fxi'zeçxa ya'jypa'gaçme' naa pa'ga maa yuhwa iiwejçx yaakxwa'j ji'phmeeta'.

10 Txãa pa'gatey kwe'sx u'se yu'pthehwa'ja's Dxus pheu'jçxa nvxiitnisatha'w, ewçxáa yũuna Kristo Jesus jxpe'jni fxi'zewa'jsa. Txã'wẽ yũuna fxi'zewa'ja's Dxusa' nyafxiiteyku pheu'jçxa nvx-iht, txã'wẽ yuuçxáa yũuna fxi'zekahn.

Dxus tasxte pa'jwa'ja's ji'phuni

11 I'kwe'sxa' nyafxiaa' ma'wēsakwe yu' txã'sna miijajkxwe: i'kwe'sxa' judiu ji'jmeei'kwe yu', aça' judiuwe'sxa' i'kwe'sxtxi's Dxus txhitxn-imeesata' j̄inatx we'we'.

12 Sa' txãa ensu' judiuwe'sx yakhmée fxi'zesa i'kwe yu', Kristo's ũuste ji'phmeesa. Sa' i'kwe'sxa' Dxus pu'çxwa'ja'swa ji'phmeesa i'kwe yu'. Txãa pa'ga i'kwe bagaçxte yuhwa Dxus tasxte pa'jwa'j yu'sa' ji'phmeesa yu'.

13 Makwe nyafxii yu' Dxus tasxte pa'jwa'ja's ji'phmeesaçxawa, ãçxha' Kristo Jesusa's nwēese'jya' utxaapa'ga, Dxus tasxte pa'jwa'ja's uyi'kwe, Kristo' i'kwe'sxtxi nwe'weya' kluuste uupa'ga.

14 Kristo' txã'wẽ yũuçxak judiuwe'sx judiu ji'jmeesatx ahçena fxi'zeni's ivxiituçxa e'zsatx teeçx jwedçxáa vxitna pa'j.

15 Sa' Moises leya'swa kaapçu'ju'k, Kristo tasx-teçxaçxáa utxaaçxa e'zsa puutx yahçemée kx-teeçxah ih fxi'zekahn.

16 Kristo' kluuste uuçxak e'zsatx kxteeçxah ih fxi'zewa'ja's vxitçxa, Dxus yakh yuuwemeesa vxit.

17 Kristo' kîhçxa' e'zîi Dxus yakh yuuwemée neeyũuwa'ja's pta'sxku, i'kwe'sx Dxus tasxte pa'jwa'ja's ji'phmeesatxwa pta'sxku, sa' judi-uwe'sx Dxus tasxte fxi'zesatxwa pta'sxku.

18 Txãa pa'ga ãçxha' judiumtha'w yuu meeçxa' judiumeemtha'w yuu nawa Dxus Espiritu's jxpa'gaçxa e'zîi Dxus tasxte pa'jwa'ja's ji'ptha'w.

19 Æçxha' i'kwe'sxa' nasa ekajuwe'sx meei'kwe, Dxus luuçx yakh kxteeçxah utxaaçxa teeçx yat-tewe'sxçxáa i'kwe yuuna pa'j jxukaysa txãa na'wêsaçxaçxáa.

20 Txã'wê kxteeçxah utxaapa'ga ew jiyute yu' i'kwe'sxa' yat na'wêsa i'kwe: yata's nyafxte' kwet yakhku ya'kaaçxida'ja', aça' txãa kaaçxida'jnisa yu' Jesukristo'. Txã'wê yuuna mjïiya' takhsa' Dxusna selpisaawe'sx vxite' Jesus jxkaahni-sawe'sxtxi yu'.

21 Aça' i'kwe'sxa' txãawe'sx kaaçxida'jna takhni kajkwete yata's ew pheu'jna umna u'jnisai'kwe, teeçx yatçxáa yuuna kãhçxa Dxus yuuçxá's selpiwa'jsa.

22 Txãa pa'ga i'kwe'sxa' Jesukristo yakh utx-aaçxa', Dxus txhitxhnisa maa yakhwa kxteeçxah utxasáa i'kwe yuu, teeçx yatçxáa yuuna, txãa yatte Dxus ũswa'j yuuya'.

3

Dxus yuwe's judiu ji'jmeetx pta'sxwa'jsa

¹ Txã'wẽ adxa' Jesukristo kaapiya'jni's pta'sxpa'ga i'kwe'sx judiu ji'jmeeçxawa Dxus yakh fxi'zewa'ja's ji'phupa'ga, preesu üsçxawa, Dxus yakh puutx we'we'th.

² I'kwe'sxa' jiiyã'jne'kwe Dxusa' i'kwe'sxtxi peeygãhçxa adxnak neewe'we i'kwe'sxtxi kaapiya'khan.

³ Sa' i'kwe'sxa' judiuwe'sx yakh utxaawa'ja's kim yuhwa jiimeene'ta yu' txã'snak Dxusa' adxa's kaajiyu'j. Aça' txã'sa' i'kwe'sxtxi nyafxii pta'sxna fxi'th walameekuẽ.

⁴ Txã'sa' lëeyçxa' jiyune'kwe kwe'sxa' judiuwe'sx yakh utxaaya' ãjawa'ja'sne' Dxusa' Pablo's kaajiyu'j sũhna.

⁵ Txã'snak nyafxii enteya' kim yuhtxwa kaajiyu'jnimée üsu', nawa açxha' Jesus jxkaahni-sawe'sx vxite' Dxusna selpisaawe'sxtxi Dxusa' kaajiyu'kh txajx Espiritu kaaũusuthe'the.

⁶ Txã' na'wẽ': Makwe judiu ji'jmeeçxawa Kristo nwe'weni's nwëese'pha'ga yuuçxáa e'zii kxteeçxah utxaaçxa teeçxçxáa yuuna pa'jçxa, judiuwe'sx yakh ja'da Dxus tasxte üswa'ja's ji'phutx, sa' Dxus üsni Kristo ji's iüçxáa jxuka jxpa'gawa'jsata'. Txã'wẽk kaajiyu'j.

⁷ Txã'wẽ yũuni's pta'sxwa'jsak Dxusa' adxa's nvxiht, txakwe wala ãhmeekwesatewa txãafi adxa's pu'çxçxa.

⁸ Adxa' Dxus yakh fxi'zesa maatewa jxthaakwe ãhmeekwesath. Nawa Dxusa' adxa'sku nvxiht, Kristo nwe'wenisa yuuçxáa kĩhtewa

thaakwe ewsa' txã'sna judiu ji'jmée vxite nasatx pta'sxkahn.

⁹ Txã'wě kīhnawa jxuka pheu'jsa Dxusa' judiu ji'jmeetxwa nwe'weçxa judiuwe'sx yakh kxteeçxah yuutxaya' ājawa'ja's txāniiteyku pheu'jçxa ji'phu' kim yuhtxwa kaajiyu'jnimée txã'sna āate pta'sxwa'jsath nvxiitni yuu maatxwa jxukaysatx.

¹⁰ Dxusa' ma'wě yūuçxa nasa ma'wēsaxtwa jxuka nwe'weçxa kxteeçxah teeçxçáa vxitna pa'jni's kaajiyu'jnik yuu, aç'a' Dxus txã'wě yūuni's āçxha' Dxus yakh fxi'zesawe'sxa', ēe walatewe'sx, angeles ma'wēsawa jxuka jiyutxna.

¹¹ Dxusa' txã'wēne' nasatx nwe'wewa'ja's txāniitey pheu'jçxa ji'phu' naa kiwe meetey txã'sa' kxtey yuuk, Jesukristo's naa kiwete kaahçxa.

¹² Txã'wě Kristo nwe'wepa'ga āçxha' Dxus tasxte ũukhmée pa'jya' ājatha'w, txã'wě ũukhmée utxaawa'ja's Kristo íik kaaūsuthe'je' naa pa'ga.

¹³ Txãa pa'ga adx i'kwe'sx pa'gate pxthaa yuuni's nxusna yajxnmée, wejxwa Dxusa'sçxáa weçxana meswe.

Kristo peeygãani iiméh seena' walasa

¹⁴ Txã'wě Jesukristo Tata' nwe'wewa'ja's pheu'jçxa kxtey yuupa'gath adxa' txã'sa' peejxūkweçxa weçxana neewe'we',

¹⁵ txã'sa' maawa jxukatx Tata jīna kx-susu' Dxus luuçx naa kiwetewe'sx ma'tx yuu, cielutewe'sx ma'tx yuu nawa jxukaysa.

16 Aça' adxa' Tata's pēyi'th, Dxus Espiritu i'kwe'sxtxi pu'çxna kīhte yuhwa peejxmée çxhāçxha kaafxi'ze'khan,

17 kxah i'kwe'sx ūusuh jxuka yajkxte', Kristo' i'kwe'sx ūuste nes yuuna. Txā'wē yūute', i'kwe'sxa' jxpubamée peeygāawa'jçxá's wala ji'phuçxa

18 Dxus luuçx jxukaysa jiyuya' ājane'kwe, Kristo peeygāhçxa nwe'wenisa iiméh seena' walasa'swa.

19 Txāa peeygāani' iiméh seena' walasa' aça' çkimçxa' jiyuya' ājama'tx? Txā'wētewa i'kwe'sx jiyukahñ Dxusa's pēyi'th, kxah Dxusa's ūusuh jxuka jiyuçxa txāa yakh yuuçxáa fxi'zene'kwe.

20 Dxusa's seena' yuh wala weçxaawa'ja'. Txā' kīhtewa jxuka pu'çxya' ājawa'jsa', kwe'sx makwe pējxtewa txāate jxthaakwe wala багаçxtewa pu'çxna nes yuuwa'jsa'.

21 Txāa pa'ga Kristo nwe'wenisa yā'j yu', Dxusa's багаçxtewa weçxana nes yuuwa'ja' Kristo nwe'wepa'ga.

4

Dxus Espiritu' ma'wēsaxwa kxteeçxah yuutx-ani

1 Kristo's selpiipa'ga adxa' preesu ūsthu, nawa i'kwe'sxtxi neewe'we'th: ma'wē fxi'zekahn ne' Dxusa' i'kwe'sxtxi txhitxh txā'sa' kxtey yuuna meswe.

2 Dxus yakh fxi'zesayā'ja' maa yuhwa iiwejçx yajkxmée wejxwa puutx ya'peeygāhna ewçxáa yūuna mfxi'zewe.

³ I'kwe'sxa' puutx ũusçxa yajkxna fxi'zemée, wejxwa kxteeçxah txutemée fxi'zewa'jçxá's mpa'pçxuwe, Dxus Espiritu' kxteeçxah yuutxa yã'kh naa pa'ga.

⁴ Txãasa Kristo nwe'wenisa yã'j yu', ma'wēsaçxawa kxteeçxah teeçxçxáak yuuna pa'ja', sa' kxazii Dxus Espiritu' teeçxsaçxá'stxi jxukaysa jxpa'ga', sa' kxazii teeçx ahte Dxus tasxteçxaçxáa pa'jwa'ja'sku ya'ũythasu',

⁵ txãa pa'gatey jxukaysatx nwe'wesa' teeçxçxá', aç'a' txã'sçxáanak jxukaysa ya'nwēese'je'. Sa' jxukaysa txã'sçxaçxáanak yajkxna bautismo's ya'jypa'ga'.

⁶ Sa' teeçx Dxusçxáa ũsa' jxukaysate Tata txã' maatewa puutejka walasa' jxukaysatx jxkaahsa, sa' jxukaysa yakh ũsa'.

⁷ Sa' teeçxçxáa vxitna pa'jçxawa, Dxusna selpiya' ājawa'j yu'sa' fxiyfxiyçxajk Kristo' ũs teeçxsa na'wēçxah.

⁸ Txã'wē yũuwa'ja's we'weçxak Dxus libroute na'jĩna fxi'jni yuu:

Ewmeesa kusejũ nwe'weçxa cielun pe'jna u'kh, Sa' naa kiwete nasatxi's ājawa'ja's ũsku jĩ'k.

⁹ ¿Ma'wēçxaga txã'wē cielute tejkak jĩna we'wé'? Kristo' nyafxte' uusaawe'sx ũsnite khuẽ'y khēeçxa txãajũk ki' cielute tejka jĩçxak txã'jĩ'.

¹⁰ Txã'wē uusaawe'sx ũsnite khuẽ'y khēesa iĩçxáak cielute iiméh ēe walate kãhpkçaçx tejka, mteewa txãaçxaçxáa jxuka thegna ũsya' ājaya'.

¹¹ Txã'wē yũuçxak Dxusna selpiiya' fxiyfxiyçxah ājawa'ja's ũs jxukaysatx teeçxsa

na'wêçxah: maaítxi's txajx yuwe's nyafxte pta'sxwa'jsak nvxiht; vxitetxi's Dxus ma'wê yũuya'watewa dxiikhêy pta'sxwa'jsak nvxiht; vxitetxi's Dxus yuwe pta'sxwa'jsak nvxiht; vxitetxi's Dxus yuwe's kaapiya'jna jxpe'jwa'jsak nvxiht.

¹² Txajx nasatxi' txã'wêk mjíiwa'jsa pheu'jçxa nvxiht, txã'wê Kristo nwe'wenisa yuutxi' jweeíçxáa kxteeçxah çxhãçxha fxi'zewa'ja's kaapiya'khanke txã'wê yũu.

¹³ Kxah jxukaysa Dxus Nçxi'ka'sçxaçxáa nwêese'jçxa txã'sa' ew jiyuna jxã'jçxa kíhte yuhwa jxpubamée ew fxi'zekahnku txã'wê kaapiya'jçxa nvxiht.

¹⁴ Txajũ yũuçxa' luuçx na'wê yuume'nja'w. Txã'wême' nasa ewmée yajkxçxa ísxiina pta'sxnite thêyméek wetena pa'jçxa kxte jxpubana ya'fxi'ze'.

¹⁵ Txã'wê jxpubamée, wejxwa isasaçxá's we'wena peeygãawa'j yuuçxá's yajkxçxa Kristo yakh jweeíçxáa çxhãçxha fxi'zena u'jwa'j ji'ptha'w.

¹⁶ Aça' maawa Kristo tasxte utxaaçxa jxukaysa kxteeçxah pkhaakheçxa puutx ya'kaapiya'jna ew yũuna fxi'zete', thêyméek peeygãhna fxi'zewa'ja'walaana u'jwe'.

Ewmée yaakxni's jxuka yu'pthehni

¹⁷ Txã'wê' aça' kxahth i'kwe'sxtxi neewe'we', vxite nasa Dxusna jiimeesa na'wê fxi'zewe'sxte. Txãawe'sxa' peekx ũus yaakxni seelpiwa'jmeesaçxá'stxi kxtey yuuna fxi'ze'.

18 Txã'wẽ Dxusa's jxpa'gaya' wa'lpa'ga Dxus yakhmée ũsçxa ew eena' yaakxwa'j yu'sa' ji'phmeeta'.

19 Txãasatx txãawe'sxa' thaame ũus yu'sa' ji'phmée, pkal seena' kazxsateçxáa fxi'ze'.

20 Nawa i'kwe'sxtxi' Kristo' txã'wẽ fxi'ze kaahme'.

21 Txã'sa' i'kwe'sxa' peekx jiine'kwe Jesus kaapiya'jni isasa's wẽse'jsa dxihçxa',

22 nyafxíi ũus yaakxni ewmeeteçxáa kaafxí'ze'jsa's nwẽese'jmée jxuka nvxihtçxa,

23 ew ũus yaakxwa'ja's kaapiya'jni yakh mphu'se'jwe.

24 Kxah i'kwe'sx ũuste ewsa yuuçxáa yu'pthehni yuute', Dxus ma'wẽne' jxthãasu' txãa yuuçxáana áate kaavxya'ja'jna fxi'zene'kwe, Dxus dxi'pte kíh pkal yuhwa ji'phmée.

25 Txãasa açxha' peena yu' ísxiina fxi'zemée, wejxwa teeçxsa na'wẽçxah isasaçxá's mwe'wewe maa yakhwa, txãa pa'gately jxukaysa kxteeçxah teeçx jwedçxáa yuuna pa'jsatha'w txãa ji'jçxaçxáatewe'sx.

26 Mpa'yajkxwe, ũusçxani yakhçxáa yu' fxi'zewa'jme', ewmeete weteya'mée. Txãa entey ya'mpeltunaíwe.

27 Eçxthē'ja's weh yuhwa ka'ga'jnuwe.

28 Pesweesawa Dxusna jiyunijũyã'ja', pesweewa'jme', wejxwa pesweemée kuseju mjũçxa vxite peejiina fxi'zesatxwa pu'çxna fxi'zewa'ja'.

29 Sa' kazx we'wenisa yu' teeçx yuweçxáa yuhwa i'kwe'sx yuweju kasehwa'jsame', wejxwa Dxus yakh fxi'zewa'j selpiwa'jsaçxá's

we'wewa'ja', kxah vxitesawa Dxus yakh fxi'zewa'jçxá's piyaatxna.

³⁰ Sa' Dxus Espiritu'swa kxūusu'jnuwe, txāa pa'gatey Dxus Espiritu íçxáak i'kwe'sxtxi's Dxus jīi vxitna pa'jçxa nvxiht, Dxus tasxna u'jwa'j en āhtewe'sx.

³¹ Sa' ewmée yajkxna, ahçena, pxūuskwe yuute juuna' we'wena, ūusaçxana ma'wēwa wēesxuna fxi'zenijū jxuka mtxuteewe.

³² Wejxwa puutx ewçxáa yūuna, teeçxsa na'wēçxah puutx peeygāhna, puutx ya'peltunāyna mfxi'zewe, Kristo kwe'sxtxi nwe'wete Dxuswa ma'wēga kwe'sxtxi peltunāy txā'wēy.

5

Dxus luuçxyā'ja' txāa na'wēy fxi'zeni

¹ I'kwe'sxa' Dxus luuçx yā'ji'kwe na' txāa na'wēy fxi'zeya' mpa'pçxuwe.

² Puutx ya'peeygāhna mfxi'zewe, txā'wē yūukahníçxáak Kristowa kwe'sxtxi peeygāhçxa Dxus dxi'pte peekíi ya'dukhçxa piisxakuē na'wē ikhni yuu.

³ Txāa pa'ga i'kwe'sxa' Dxus jīiyā'jçxa', ptamsa ma'tx yuu meeçxa' ptamsamée ma'tx yuu nawa kazx yuuna fxi'zeni's jxuka nvxihtçxa ūusteçxáa yuhwa yaakxwa'j ji'phmeei'kwe. Sa' Dxus yu's yajkxmée ji'phu wēeniçxá's yaakxwa'j ji'phmeei'kwe. Kihwa kazxsa yu'sa' kxsuswa'jçxáa yuhwa ji'phmeei'kwe.

4 Thaampa' yūuni kīh yuhwa seelpimeesa yu'sa' txā'wē we'wena fxi'zewa'jme', wejxwa Dxusa'sçxáa weçxana fxi'zewa'ja'.

5 I'kwe'sxa' jii yā'ji'kwe: Dxus yu'sa' yajkxmée ji'phu wēeniçxá's yajkxna fxi'zesa (txā'wē ji'phu wēeniçxá's yajkxte', txā'sçxáanak dxus na'wē yaakxwa'j kaseje'), kazx pkal yūuna fxi'zesa, kīhwa kazxsaxçá's kxtey yuuna fxi'zesa, txā'wē yūusa' Dxus Kristo yakh jxkaahna ūsnite u'kaya' ājameetxna.

6 Txāa pa'ga txā'wē pkal kazxsate fxi'zewa'ja's kaapiya'jni's mpa'yajkxwe. Txā'wēme' txāa pa'gáiçxáa Dxus kastigo seena'sa yuja' Dxus jxkaahni's nwēese'jmée fxi'zesawe'sx jīi.

7 Txāawe'sx yakh ja'da ewmée yūuna fxi'zenuwe.

8 Nyafxiaa' i'kwe'sxa' jxpubana ūsçxa', çxhi'dxte na'wēi'kwe fxi'zesa yu'. Nawa açxha' Kristo's ūuste jxpa'ganijū' eena'te ūsi'kwe. Txāa pa'ga peena yu' jxpubamée eena'teçxáa mfxi'zewe Kristo nwe'wenijūyā'ja'.

9 Eena'te fxi'zeççxa', puutx peeygāhna isasaçxá's we'wena fxi'zewa'ja', Dxus dxi'pte jxpubamée.

10 Naasáa Kristo jxthāasniçxá's kxtey yuuya' mpa'pçxuwe.

11 Jxpubana çxhi'dxte ūssa yakh ja'da ewmée yūuna fxi'zenuwe, wejx yuuya txā'wē yūusatxi' mkaapiya'jwe ewmée yūukahmen.

12 Txā'wēme', paaçte txāawe'sx ewmée yūuna fxi'zeni's āate we'wewēete thaame yuja'.

13 Nawa txāawe'sx ewmée kazx yūuna fxi'zeni's thaamemée āate we'wewa'ja', kxah

kĩh yuhwa paaçtemée jxuka ãateçxaçáa kaavxya'ja'jni yuuna.

¹⁴ Txã'sna we'weçxak na'jĩ':

Jxpa'yakxmeeg fxi'ze', miijajkx.

Sa' pkalte uuní na'wē fxi'zenijũ mkaaseh,

Aça' Kristo' eena'te kaafxi'ze'jena jĩ'k.

¹⁵ Txãa pa'ga wala jxpa'yajkx fxi'zewa'jçxá's dud mpa'pçxuwe, jiimeesa na'wē jxpa'yajkxmée yu' fxi'zenuwe.

¹⁶ Txã'wēme' naa ensu' nxuswa'j ençxáa kasejeça', naa pa'ga en ewsatxi' ivxiitunuwe.

¹⁷ I'kwe'sxa' jxpa'yajkxmée yu' fxi'zemée, ewsa's jiyuwa'ja's mpa'pçxuwe, Kristo jxthãasniçxá's ew jiyuya'.

¹⁸ Txãasa tũuna fxi'zenuwe. Txã'wēme', tũunisa' vxituwa'the pe'jna u'jsa'. Aça' txã'wē yũumée wejxwa Dxus Espirituçxá's ũuste jxuka jxpa'gaçxa,

¹⁹ i'kwe'sx pwe'sx jxukaysa Dxusa'sçxáa ũusuh jxuka yajkxna weçxana memna meswe.

²⁰ Makwe wala thēysa vxyaatewa, txātxi's nxusmée багаçxtewa Dxusçxáana weçxana meswe, Jesukristo's pi'kxçxa.

Jxukaysa puutx ya'nwēese'jna fxi'zeni

²¹ Āçxha' i'kwe'sx pwe'sx jxukaysa puutx ya'nwēese'jna mfxi'zewe, Dxusa's yajkxna.

²² Nyuua' nmi'a's nwēese'jwa'j ji'pha', Kristo' txã'wēk jxkaaja' naa pa'ga.

²³ Txãa pa'gatey nmi' txã'wē nyuua's thegna jxpe'jwa'jsa', Kristowa ma'wēga txajx nwe'wenisatxi's thegna jxpe'je' txã'wēy. Aça'

Kristo' ĩ'neeçxáa thegna jxpe'jmée, vxitukahmen nwe'wesa'.

²⁴ Aça' Kristo nwe'wenisawa ma'wêta Kristo's nwēese'je', txã'wēy nyuuwe'sxwa nwēese'jwa'j ji'phta' txãawe'sx nmi'tx kīhtewa jxuka.

²⁵ Āçxha' nmi'a' nyuua's peeygāawa'j ji'pha', Kristowa ma'wēga txajx nwe'wenisatx peeygāhçxa txãawe'sx pa'gate kluuste uu txã'wēy.

²⁶ Kristo' txã'wēk yuu txajx nwe'wenisa nasatx kīh pkal yuhwa ji'phmée jxuka yaatena pa'jçxa,

²⁷ txajx tasxte iiméh zhiçxkwe pheu'jni txãa yuuçxá's selpiwa'jsa vxit-ya'k txã'wē yūu.

²⁸ Nmi'a' txã'wē peekx nyuua's peeygāawa'j ji'pha' peekx kakwe'swa ma'wēga ya'peeygāja' txã'wēy, txãa pa'gatey nyuua' peekx kakwe'ićxá' naa pa'ga.

²⁹ Kim yuhwa peekx kakwe's açe'çme', wejxwa wala ew jxpa'yaki'k. Aça' Kristowa txã'wēyku txajx nasatxi' wala ew jxpa'yakxna jxpe'je'.

³⁰ Txãa pa'gatey txãa jīi yā'tha'w, txajx tasxte txuteeya'mée utxasáa.

³¹ Txã'wēyku ya'yu', ptamusawa peekx neywe'sxtxi nvxihtçxa nyuu yuuwa'jsa yakh ya'utxa'k txuteeya'mée, aça' e'zçxawa teeçxçxáak yuuna pa'ja'.

³² Ptamuuçxa fxi'zenisa' Kristo txajx nwe'wenisa kxteeçxah utxaaçxa teeçxçxáa yuuna pa'jwa'ja's kaajiyu'jnisa', aça' txã'wē teeçxçxáa yuuna pa'jwa'ja's kim yuhwa jiimeetx yu' txã'snath pta'sxi'.

³³ Aça' ptamsayā'ja', teeçxsa na'wēçxah peekx nyuutx peeygāhna fxi'zewa'ja', i'kwe'sx kakwetx

ma'wěkwe peeygāja' txā'wěy. Aça' nyuua' peekx nmi'a's nwēese'jna fxi'zewa'ja'.

6

¹ Kristo's jiiyā'jsa' luuçxwe'sx i'kwe'sx neywe'sxtxi nwēese'jna mfxi'zewe, Kristo' txā'wěk jxkaaja' naa pa'ga.

² Txā'wě kxtey nwēese'jsatxi's Dxusa' wala txaçx kaafxi'ze'jya' neeyūuk txā'sa' Moises leyte na'jīna pta'sxna fxi'jçxa nvxiitni ūsa': Peekx neywe'sxtxi nwēese'jçxa',

³ wala ew fxi'zene'ga naa kiwete wala txaçx jī'k.

⁴ Neywe'sxwa i'kwe'sx luuçxtxi zhiçxkwe ewçxáa miipe'jwe, Kristo's jiyuwa'ja'sçxáa kaapiya'jna.

⁵ Selpisaawe'sxwa naa kiwete i'kwe'sx patronwe'sxtxi wa'lmée mwēese'jwe, Kristo yu's nwēese'je'ç na'wě yajkxna.

⁶ Patronwe'sx thegna ūsteçxáa txā'wě kxtey yuuwa'jme', wejxwa Kristo's nwēese'je'ç na'wě yajkxna kxtey yuuwa'ja', ūuste weçxana.

⁷ I'kwe'sx mjīia's wa'l yajxmée Kristo's selpiiçthu sūhna ew mjīiwa'ja', nasatx selpiiçthu sūhmée.

⁸ I'kwe'sxa' jiiyā'ji'kwe patron ji'phsa ma'k yuu patron ji'phmeesa ma'k yuu nawa txā'wě yūsaxti' Dxus dewewa'jsa' teeçxsa na'wěçxah ma'wě mjīisatewa.

⁹ Patronwe'sxwa i'kwe'sxtxi selpisaatx juuna' yūumée miipe'jwe, txāa pa'gatey jii i'kwe selpisaawe'sx vxite' patronwe'sxwa jxukaysa Kristo cielute ūssa teeçx yuuçxána

nwēese'jsai'kwe. Txāa pa'gatey Kristo dxi'pte' maa yuhwa thaakwe walasa meeta'.

Ewmeesa's deewewa'ja's jxpa'gani

¹⁰ Āçxha', yakhthē'jwe'sx, çxhãçxha mfxi'zewe Kristo yakh txutemée, açã' txã' pu'çxna nes yuuna bagaçxtewa kçxhãaçxha'jna.

¹¹ Txāa pa'gatey ewmeesa yakh puiiwa'ja's Dxusa' jxuka ūsku, açã' txāa yakh puiiçxa', eçxthē'j ewmée yūunite wetemeene'kwe.

¹² Txã'wēme', naa kiwete nasaa pwe'sx yakh puiina ūsmeetha'w. Naa kiwete eçxthē'j ma'wē seena' ewmée kazx txãaçxaçxáa jxkaahna ūsna txāa yakh kwe'sxa' pdxi'puçxa puiina ūstha'w.

¹³ Txāa pa'ga ewmeesa yakh puiiwa'j Dxus ūsni's jxuka mpa'gawe, ewmeesa yakh pdxi'puçxa ūukhmée çxhãçxha deeweya'. Txã'wē yūuçxa', ewmeesa ma'wēsa'swa i'kwe'sx yuh knayuune'kwe.

¹⁴ Txāasa açxha' ūukhmée çxhãçxha meswe, Dxus yuwe isasaçxá's ūuste ew yu'akhçxa kxtey nwēese'jna. Ew yūuwa'j yuuçxá's ūuste jxuka mji'phuwe.

¹⁵ Sa' Dxus yuwe ewte nvxiitwa'jsa's mteewa pta'sxya' u'jya'çxáa meswe.

¹⁶ Açã' Dxusa' kíhtewa jxuka pu'çxhina sūhwa'j yuuçxá'sa' weh yuhwa peçxkananuwe. Txã'wē yaakxni yakha' eçxthē'j makwe seena' yuuçtewa, jxuka knayuune'kwe.

¹⁷ Dxus nwe'wenijūyã'ja' txãajū weh yuhwa txutenuwe, sa' Dxus Espiritu kaapiya'jni Dxus yuwe'swa weh yuhwa peçxkananuwe.

¹⁸ Txã'wêçxáa yũumée, Dxus Espiritu's pi'kxçxa Dxus yakh yuuçxáa bagaçxtewa puutx we'wena meswe, çxhãçxha fxi'zewa'ja's pêjxna. Sa' Dxus yakh puutx we'wewa'ja's bagaçxte yuhwa peçxkanamée meswe, Dxus luuçx jxukaysa pa'gatewa Dxusa's mneewe'wewe.

¹⁹ Sa' adx pa'gatewa Dxusa's neewe'wena meswe, kxah Kristo's ma'wê ũuste jxpa'gawa'ja's kim yuhwa jiyunimeesa's sxiigmée pta'sxya' ãjakahn.

²⁰ Txã'sna pta'sxwa'jsa íçxáak Dxusa' adxa's nvxiht, açá' txãa pa'ga íçxáa ãçxha' preesu ũsthu. Açá' i'kwe'sxa' Dxusa's neewe'wena meswe, txajx yuwe's ũukhmée pta'sxkahn.

Yuwe weçxaa kaahni

²¹⁻²² Kwe'sx yakthê'j Tíkiko bagaçxtewa Dxus yakh txutemée pta'sx pu'çxsa txã'sa' kajaçthu, adx ma'wêne'tka fxi'ze' txã'sa' jxuka pta'sxkahn. Açá' adx ma'wê fxi'zena kîhçxah yũuna ũstewa jiyuçxa', i'kwe'sx maaíi yu' nxusna ũsçxawa çxhãçxha yaakine'kwe.

²³ Dxus kwe'sx Tata vxite' kwe'sxtxi nwe'wesa Jesukristo txãawe'sxa' i'kwe'sxtxi pu'çxhitxna, kîhtewa ewçxáa puutx ya'peeygãhna Dxusa's yuuçxáa yajkxna fxi'zekahn.

²⁴ Sa' maawa kwe'sxtxi nwe'wesa Jesukristo's yaakxsa yuutxi's Dxusa' pu'çxhina jxukaysatx.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd